

54775



南齋集卷三

寄熊山弟保康

祁門 馬曰璐

佩兮



遺墟房子國民俗未全淳地近鄖鄉僻官惟邑宰
親移風寧在猛爲政莫憂貧書附隨陽鴈相期物
共春

初冬有感

無奈此蕭辰苔階葉半湮難尋曾過跡因感復來
人日晚林風急心孤舊友親流年同寂寞欲去更
逡巡

銅鼓歌

銅鼓銅鼓來何方聲價欲較千牛昂蕭晨有客開
 涼堂偶然得睹矐目眊疑盤疑鉦疑釜鐺非秦非
 漢非夏商其徑不啻尺半強細紋十道羅中央雲
 雷乳粟分微茫凹腰疊耳苔花蒼生砂活翠堆兩
 旁摩挲盡日騰晶光以杖試擊音鏜鏜蠻煙瘴雨
 凝捲腔蛤鳴或自高州鄉不然進獻由南康客曰
 否否白獠藏羅施鬼國斯惟臧當年桂陽本要荒
 武侯鎮服軍威揚冶銅鑄鼓施用良百酋效順安
 箐篁惜哉漢運不復昌中原囊括志未償出師未

遂星墮芒誰歟虎視兼龍驤械巧僅得留邊疆嗚
 呼陵谷幾滄桑只有此鼓無興亡南天萬里道路
 長不脛而走神扶將秋窮氣肅天蒼涼臨風憑弔
 愁詩腸

于酒

遺法來良醞名家未許參詩傳東澗老品擅大江
 南奕葉論前代微吟盡此坭恰宜佳客共踈酌記
 精藍

邵文莊公溫硯爐為西疇作

彌明擬神仙景山稱名士茶鼎與酒鎗兼得擅風

旨況茲文房奇雅式補硯史用與束薪同形非熨
蕉比竅通坎離中勲策冰雪裏吾儕日無事琢句
當耘耔聊作燒田耕庶幾火化美研墨煙松融漬
豪健免起麗事開寒廳清味滿生紙不獨容春堂
曾書日格子

送謝山歸四明

三年一握手何遽唱驪駒竹裏書籤亂窗間酒盞
孤愁心揚子渡寒色賀家湖行李兼風雪蕭蕭歲

暮俱

謝山曾賦
寒色詩

分詠四明古蹟重送謝山得賀公釣臺

幽棲本足樂何必定爲官千載留釣石至今溪鳥
寒遂初羨此老君歸亦故山相思時有寄遺我一
漁竿

丁卯正月六日郊遊用陶淵明遊斜川韻

孟陬開六日物役聊暫休風從東方來吹我及茲
遊宿草抽新穎輕冰坼寒流片片襟上雲點點煙
際鷗竹木坐深蔭儼然對淵邱民動自如煙靜者
各爲儔篇中有興託酒外無獻酬未知後來人得
知此時否古寺閱流水春田散煩憂良辰不共適
百年將何求

題西疇圖

茅屋低於花蕊疎林露出山椒何處雪香雲冷居
然牛健鴉嬌助耕有此妙筆懷新想見良苗更欲
添攜酒榼雞豚社裏招邀

春日張嘯齋漁川家兄懈谷同過簡公塔院
飲桃花下

桃放竹林邊攜壺覺灑然我來同是客看處不妨
禪眼纈芳菲外顏紅醕酌先問誰知此意燕子正
翩翩

著老堂分詠春蔬得杞苗

井口茁寒茗小摘未盈掬其味元功成其下靈犬
伏飢可充空腸飽卽雜誦讀一笑我何貪取配想
萌菊

集讓圃投壺

壺矢破春陰庭前風滿林閑投寧合格偶中卻無
心試賭詩頻詠難辭酒屢斟成驍同一笑驚起竹
間禽

展上已集環溪草堂流觴讌會

懷抱今朝得好開陸家池上拍浮來同脩故事重
三展得近名流竟日陪魚藻情閑溫坐石楊花風

急換行杯淮南節物駸駸去鄰寺昏鐘莫漫催

三月晦日招同人小集

愁人忘日月忽忽春欲歸春來自相背春去寧相
依閑庭淡以寂衆綠驚林扉握手桃花前日暮風
吹衣襟袖承落花時鳥帶聲飛黃楊獨厄閨餘芳
戀亦稀只有排日來微吟其庶幾客心日有適我
意終多違

賦得新蕉送西疇之新安

甘蕉乍展陰亭角已沉沉未灑三秋雨先愁一寸
心夢頻知有托書遠恐難任不定風中旆離思滿

故林

行菴聽鳥

行菴春色委平蕪不見花間白與朱襟契每成共
命鳥林幽堪作會禽圖黃荃有會禽圖高枝翠合風弦墮小
院人稀碎語呼安得五更禪榻上更聽殘夢更驚
無

松花

冰霜歷已遍春盡亦花開正色映緜帙清芬散石
臺采妨巢鶴覺咏有上真來靜看和雲落紛紛入
酒杯

初夏

斗杓回夏律簾幙啟南風花孤時出草雲晴未作
峯江南春去後清冷袷衣中

萬景歸冲淡幽襟午興騰圍碁鋪粵簟試茗約吳
僧南園蝴蝶夢碧樹隱層層

剡剡麥苗秀陰陰桑野閒蠶蛾幾日老雉子此時
班非因望三益長日不開關

漁川齋中蘋花

雙眼玉無瑕盆池見此花色清含雪雨根長換江
沙水荇非同屬風蓮欲一家因之懷柳惲乘馬日

西斜

謂意田

為寄舟上人題天池石壁圖

峭石摩天雲止水湛靈府誰為寫此圖中有道場
古上人池上來度難救諸苦披圖已起予恍如聞
信鼓惜哉廿載前覲面落宿莽他日倘重遊迷徑
當問取

五日席間詠嘉靖雕漆盤聯句

盤形如荷葉中刻龍舟芙蓉水禽之

屬底有金字云大明嘉靖年製

有明迨中葉

馬曰

製器率由舊麗盤出摩挲

汪玉

髮漆

工刻鏤式自果園遺

屬

法匪楊漚授三蚪脆松黏

馬曰一葉卷荷皺堆灰屢磨刮陳章設色雜紛糅中央

赤龍船姚世鈺鱗甲動陰豷水殿撥露橈張四科疑習昆明

鬪旁繞紅荷湖瑄曰毛羽啞羣嚼風蒲舞芸苗玉樞宛

向太液靚光潤本欲測鶚堅緻卻無厚憶昔世廟

年路曰正屆重五晝盧橘上林珍章香菰御廚侑排

當走黃門世鈺羅列承翠袖掌異銅仙擎四科歌傳玉

蛾奏戲金欸猶新瑄曰剔紅器逾壽賞心良朋合玉樞

僂指佳節又清尊助酣嬉鶚草具亦飭餽象牙未

云奢路曰蚌殼無乃陋奇技古所非章善價今方售

底須弔湘纍世鈺故物感詞囿四科

展重五集小瓊瓏山館分賦鍾馗畫得稱鬼

圖

肥鬼胥肱中作鮓瘦鬼伶俜無一把潛行聿役等
飄風何用星星較量者世間萬事誰持平輕者反
重重者輕任渠伎倆各逞弄分際難以逃權衡終
南進士啜鬼血肉可啖兮眼可抉擇肥莫道柄操
吾並恐權衡被渠竊

喜雨用建除體

建月維未愁驕陽除庭旱魃眠食妨滿空雲滃傾
天漿平地忽深一尺強定力所禱倍往常執缶不

煩歌倉箱破券買得盆荷香危闌劇賞殊相羊成
秋先於焦穀芒收穫已在硯席旁開卷與誰論短
長閉戶且圖今夕涼

雨後兩明軒坐月

華月吐花南朋歡復此耽暗荷殘雨瀉叢竹濕光
涵移席依清景憑虛接夜談無煩白羽扇心冷湛
秋潭

七夕分賦得玉庭開粉席效唐人試帖體

玉露下中庭蘭筵粉澤馨由來勤供設不自惜娉
婷暗裏移粧匣風前展畫屏砌涼疑積素河近欲

通靈蠲潔奔軺集芬霏倦軫停年年雜瓜果餘巧
乞雙星

平山堂秋望

迴與常時別登臨有此朝堂高隨境古山遠挾秋
驕到眼空雲物吟詩入泐寥無煩唱楊柳梧葉暮
蕭蕭

九月十五日集行菴招大恒具如兩師茶話

重陽節過逢新霽秋老林扉景色閑未掃苔階留
落葉偶聞僧語認深山夕陽舊殿雙金錫古寺黃
花一病顏今日相攜同把臂不知身世落塵寰

送陸茶塢歸里

君來蟬未鳴君去鴈南征遠色催行李高帆挂別
情江南霜落潮痕減古寺鐘昏木葉驚西風颯颯
送君行送君行飲君酒兩地相思期不負何日偏
提重在手吳宮花隋苑柳

霍家橋道中和竹町韻

客有探幽興村田一徑尋招邀農事暇珍重歲寒
侵木落見遙水梅香指舊林卻看籬落近微詠夜
燈深

冬夜同樊榭堇浦竹町西疇玉井南圻于湘

家兄嶰谷宿南莊

梅花一枝橫碧沼似爲荒村破枯槁詩人衫袖有
春風淡月窺人況林表牀鋪丁字聯清冬四圍水
木霏微中地白時看鴈影過窗虛更覺江天空獨
我吟聲何太苦月色花光互吞吐詩成遙答遠山
鐘夜靜不傳街市鼓人生會合安可常趁取酒熟
清而香明朝更放烟江棹水宿雲眠枯木堂

焦山觀音巖晚望用宋人趙冰壺韻

雲磴依稀屐齒存茅亭登歷海光昏音兼吳楚人
重到氣壓曹劉句早吞萬里奔流浮落日十年清

景問棲猿江山佳處歸長望嘯倚天風坐石根
焦山看月以江流有聲斷岸千尺山高月小
水落石出分韻得高字

蒼巖與我稱素交乘冬問訊浮輕舸探奇未暇坐
甫定仰見皓魄東南高初圓未減月幾望不同弦
影含弓嵌銀盤初挾晚潮上玉玦漸度林風颺此
時目力到煙海微茫一片連洪濤況當嚴辰斗插
子寒空氣翳無纖豪人影在山月在水霜風披拂
惟吾曹魚龍鼎沸棲鶻叫應是水怪山精逃廣寒
之府不虛誕雲中定有仙人遨始知天公昨調弄

晶瑩欲騁光先韜出門一笑大江湧作詩紀事欣
吾遭

登雙峯閣以清磬度山翠閒雲來竹房分韻
得來字

高窗出林表攀蘿窮崔嵬衰齡失遠步曠歲欣朋
來幽遐靈跡閱晃朗香臺開依然昔遊處宛似清
夢回捐情白雲內流矚寒濤堆遙峯各相屬欲下
仍徘徊

寒夜石壁菴聯句

為愛焦山好清冬況得朋馬曰來因海月滿宿憶翠

微曾鴈梵室鄰峯勢經樓避石稜方士閑攜塵外拂

吟借佛前燈馬曰風動飄金磬天高淡玉繩杭世松濤

時警鶴芋火漫隨僧陳章梅氣贖芬馥江聲聽渤澥

閔靜參禪一味冷泥酒三升陸鍾夢擬靈祠乞銘從

古鼎徵樓帶圍思楚玉像繡展吳綾曰鼉更蓮漏

已為僧付質庫舊事添圖牒奇懷入寢興鷲瑤寺有楊文

續龍藏竹錐騰士篆印銷婆律牀敷暖氍毹曰空

談對劉勰名理叩張憑世覆局棋收電停豪硯結

冰章森森寒氣冽晶晶夜光澄華興劇渾無寐神

凄恐不勝鍾明朝放歸棹游思尚飛騰錡

歸宿南莊二絕

梅花閑與月明分鶴柵鷗巢共一羣點起吟燈清

不寐江山回首足寒雲

圓蟾倒浸水晶宮三宿回船趁便風歸到柴門翻

悵望不曾吹笛浪花中

題趙子固畫蘭

有宋王孫深林獨處清映一門韻標千古托意幽

蘭春風自主簡葉疎花停辛佇苦天涯芳草淪於

下土衆人之中君子是伍我展斯圖如睹眷宇楮

墨無痕芳馨不譜

冬日集延清閣分詠得衣篝

疎密斜文製作良吟衫常爲出空箱曾因梅潤旋
添火直到天寒更炷香淺纈覆將便體弱退紅倚
處記宵長年來冷置維摩室千眼同看是法王
同南圻坐南齋竹下有懷曲溪吳門西疇新
安

離居方索莫失喜得幽尋把卷石闌外懷人脩竹
林吳帆春水濶鄉夢白雲深莫漫孤今夕殷勤酒
共斟

強醉

到手杯巡思努力捲波風味笑沾唇年來戶小亦
解事闌入歡場學酒人

微醉

飲少輒醉亦可喜毋多酌我豈因狂由來嗜興平
生意花賞嘗留一半香

扶醉

行步欹危餘興在自扶還勝倩人扶東風氣力過
於杖又引前村覓酒沽

閒醉

醒是悠悠醉更休也無磊磊也無愁牀頭酒甕常

教滿臥對南山不下樓

官橋道中

年年山路筍輿遙過盡溪流過斷橋二十五回寒
食節松風吹雨晚蕭蕭

新燕

新燕已成故驚看故燕新交飛社公雨相遇落花
辰軟語真愁聽紅樓又一春營巢何處好淒斷捲
簾人

清明日獨過環溪竹町已先至卽次其韻

歲歲年年冷淡身清明時節感流塵東風陌上無

行跡落日花間有故人地似輞川偏愛水文如貞
曜不嫌貧相攜況復耽吟侶一詠當前見在春

霽色東嘯齋西疇漁川南圻玉井諸同社

最喜濃陰旋放晴碧煙散盡小窗清已通竹外希
微影猶聽花間點滴聲簾額高牽醒睡眼山光半
入引詩情層樓風雨愁都減望遠憑誰句早成

積雨初霽集平山堂看牡丹復過環溪

一春愁病懶逢迎遠岫褰雲佛閣平多謝招邀今
日好出城剛雨到山晴

看花餘興過前村竹隱平橋水映門更有垂藤吹

宿雨陸家池上未黃昏

雙眼瞢騰霧裏開吟詩清興欲全灰春風翻似相欺得一日闌邊看兩回

獨來

獨來何事不傷神聽得桑鳩喚雨頻花事已空旬日裏綠陰池上寂無人

偕西唐過青畬書屋

水竹南村好欣茲素友俱麥晴衣覺冷沙斷路疑無劬笋開園鎖看潮對酒壺非君機事泯誰狎野鷗孤

敏上人山房牡丹

上人行苦松回肘肯爲繁華管領來壞色衣中新法界行春臺畔舊香胎汲泉煮茗供閑客帶雨哦詩照碧苔五百花頭齊不着禪心那有一枝開

雨後小漪南亭上

一曲闌干入畫圖酒船移影隔菰蒲荷當驟雨晴才放人趁涼雲遠亦俱清景莫教煙際失淨香惟覺淡中殊頻年慣賞蕭閑境又對湖天狎野鳧

懷西疇新安得樓字

昨日山有信君仍山中留曾寄一行書山深知達

否相思意無限相望時登樓以君粉梓戀深我埋
瘞憂時托西疇攜青烏家至揚州為亡內營葬地經營事方起有願何從酬非
君不可理日日盼回舟

立秋後一日有感

楚角聲中賦落梅予前有悼亡梅花卷子流年電抹苦相催潘

郎老去秋心在又算人生夢一回

閏七夕

雲影涵秋冷畫羅水流星轉憶經過不知織女停
梭後復有何人曳絳河

南莊月夜西唐家兄嶰谷同作

暗露滴涓涓月明人未眠夜深開水柵潮滿步秋
田語寂鶴飛過夢涼鷗占先宵來好光景併在桂
香前

題秋林讀書圖

平生愛貯書千卷卻笑搬薑鼠與同何似西風紅
樹底一編有味在胸中

題南圻東風第一圖

團圞酒滿詩滿氤氳爐紅燭紅歲籥五移花外圖為

舉子年作春風又報圖中

春日過宜莊

掩映小桃紅園林畫稿中花間逢暮雨池上坐春風浴浪鳧迎客聽詩鶴出籠得陪巖壑侶歸晚悵

匆匆

意田適至自茗上

簡宿南莊諸同人

數步垂楊接肩輿苦促歸如何千里共翻使寸心違雨滴虛窗夢池開淡月暉煙波隔良夜空憶白鷗飛

題程尊圃抱琴攜鶴圖

心地和平百慮捐底須指下說流泉披圖如聽衆山響此趣常存動操先

曾讀仙人相鶴經長身磊落聳青冥一絲雲骨休嫌瘦稱爾同尋到福庭

題詩笑我太遲遲方丈維摩促致詞何物報君充七發停琴放鶴亦良鑿

尊圃出照索題經月未報近聞養疴江寺復以札來促且云望詩已疾故有末

環溪看桃花

春衫葉葉趁晴天十畝閑園二頃田行過小橋南畔路桃花開到竹林邊垂楊垂柳識重來簇簇紅雲入酒杯彷彿江南好顏色水風清潤小窗開

南齋集 卷三
山根闌角總春風隱映斜陽面面紅尤愛池心亭
子上花光人影碧流中

賦得未到曉鐘猶是春

九十光陰成小住春心一點托僧寮試思樓角鐘
初動可得筵前燭屢燒短夢鶯花判隔歲稱心琴
酒尚今宵與君況是頭如雪漫說朝來折柳條

集小瓊瓏山館看芍藥以紅藥當階翻蒼苔

依砌上分韻得苔字

青駕不可駐將離花正開花開惜餘景爲約故人
來疎簾晝窈窕斜日晚徘徊非君幽賞共明恐委

蒼苔

雨後集七峯草亭時與家兄懈谷自北歸

愛我亭外竹翠色深如染招我亭中人微吟雙戶
掩風清衆草披雨歇繁英斂何事出經旬年華坐
荏苒

東還因語諸公泰山之勝

岳色奉朋歡都忘歷險難興追丹嶂外身置白雲
端天闕三千仞松梯十八盤惟愁說不盡一味是
高寒

夏日田園雜興

百齋集 卷三
分龍節後田園好泱泱溝聲最愛聽豆葉陰成蟬
得氣稻苗風起鶴梳翎占年不用呼庚癸畏雨時
還畫丙丁更有蒲蓮足清趣看從沙尾上蜻蜓

賦得松涼夏健人

不知何事蒼松下六月宜人一味涼欹枕總成幽
澗夢憩陰堪作養生方彈來流水閒相和棲共胎
禽瘦不妨況是清風買無價三層樓上足相羊

蟬

六七月之間有蟲曰遮了其名解自呼獨知風露
早居高本無心守潔似有道故於騰化中飢腸恒

不飽迨至秋霜飛喑默詎能保始歎九霄仙終焉
抱莖槁

七月七日具公招同人集天寧寺方丈

謝寺一郡古上人開北軒招邀在文字疎花照禪
門淡淡茗椀綠裊裊爐香溫青青萬竹竿中有秋
氣存友舊情易愜辰良意彌敦雨定各衣袂流咏
眺閑原

閏七月望日集晚清軒

池上逐閒鷗停琴此續遊
曾聽陳道士彈琴於此由來三伏雨
換得一庭秋葉落知人瘦花疎出草幽今宵明月

南齋集 卷三
底莫負露華浮

秋陰

高天已寥落，況復晝沉沉。
疎樹籠涼雨，蕭雲翳遠岑。
離心空際墮，霜鬢淡中深。
稍待澄清景，還期竹院尋。

過文上人影堂

木犀香裏過西林，不見圓公直至今。
經卷藥爐前恨在，茶煙禪榻舊緣深。
曾因清話消愁疾，豈料秋風急暮心。
總把浮生入彈指，年來白髮已侵尋。

題汪敬亭君子堂圖次韻

胸中有佳處，神宇輒疎敞。
何論古與今，契合同一想。
矧茲萬斯竿，清風送逸響。
堂顏前躅留，為石田衡山兩先生遺煙墨積翠。
養依然三大字，幽人見來往。
蘿徑開澍江，物態無慨慷。
水鳥亦羣飛，巖花作勝黨。
所惜喧寂分百里，阻遐賞。
展圖秋氣鮮，緬古絕言象。
卻羨後來賢，吟詩復道上。

送泚江太史之楚赴撫軍唐莪村先生約

老矣先生興尚乘，馬頭紅樹隔層層。
楚山日落人千里，鄂渚風高鴈一繩。
預想題襟吟卷續，遙知坐月夜樓登。
武昌魚味宜城酒，待取歸談竹下燈。

題胡嘉令海濱圖

徘徊下澤意如何金鑑羅胸利濟多莫道辛勤轉
沉滯海天高日照流波

題吳漢延坐禪圖

九畹香風自遠三升玉液時斟何事分身入妙蒲
團坐斷雙林

閑園用香山閒居春盡韻

閑園春老幾開扉剩見繁桃葉底稀同是耽吟情
有託不妨卜夜醉無歸輕陰漠漠籠晴色芳靄層
層散客衣貪聽林中快活鳥都忘天際碧雲飛

邀樊榭竹町于湘看牡丹酒半移醉繡毬花

下作

燈轉闌干月轉空花殘猶得貯春風不因被酒還
移席孤負故人今夕同

東樊榭竹町紅橋之遊

閑遊最好晏溫天綠樹陰濃靜管弦想見吟聲出
篷背沙禽飛過筆牀前

紅橋煙水幾多寬擬作西湖一角看我欲明朝相
約去夕陽同倚曲闌干

錢牧齋香楠木几一蟠木椅一在良常王吏

部家轉歸余山館因賦

非竹非梧光照壁滑淨寬平長七尺丹鉛遺跡尚
斑斑不見花壺與琴冊絳雲樓上屬虞山萬卷駢
羅一炬殘劫餘青史功名誤頭白名山著述難歲
月推遷屢流轉良常仙去歸山館木牀三腳伴題
詩喪我他年知不免

野橋

橋斜與路平獨木自爲橫鎮日無人過孤村野水
生落花低易聚臥柳窄妨行祇有田夫識相將事
耦耕

雨中泚江嘯齋竹町西疇南圻玉井漁川見
過有懷家兄淮上

寂莫山居喜屐聲柴扉乍啟徑苔平三春祇有殘
春在十日都無半日晴剩對落花頻夜話莫將閒
事攪浮生顛風急雨高歌處還念清淮一舸橫

五月晦日雨後集篠園水亭因懷謝山得向
字

水鳥掠荷花吾亦知所向虛亭幕柳煙沙尾進孤
榜憑闌霽色開隱約聞漁唱景物頗冲融襟抱復
閒暢日晚雲陰移淨香出水上忽憶去年人悵然

成俯仰

鸞翎歌

鸞翎鸞翎何陸離昔聞其說今見之彩絲千點燦
金碧綠暈十道團琉璃天數地數分雄雌光映日
月符昌期中朝翟弗爾羽儀胡爲零落荒山屨女
牀棲深遠莫知連翩想見仙人騎璀璨之中感離
披得毋華美致於斯焚身斷尾古所悲人生安用
文章爲嗚呼人生安用文章爲

貍奴一頭送泚江太史

貍奴將子又今年底用魚餐作聘錢幾度遣行慙

舊主褐花不稱錦茵眠

也知毛色非佳種澤吻磨牙有母風送與先生成
一笑護書可得奏微功

越日泚江酌以鹽筆詩句復綴一絕

筠籠相送愧遲淹博得雙豪箸裹鹽更有新詩成
故實他年留待楚金添

題友人蘭花卷子

一葉一花新花開不爲春光風凌衆草幽馥在無
人意簡有餘韻巖深少四鄰誰言紉作佩只許楚
臣親

展重五紅橋觀競渡詞

紅橋已過端陽節競渡今年展一旬消得遊人不
歸去夜深明月照湖濤

飛楫中流亦壯哉紅旗畫幟足徘徊就中只有清
吟客曾爲荷花兩度來

柳風拂面水平隄手藉松枝當握犀謂補翁話久不知
鏡鼓寂放船依舊五塘西

水亭觀荷禁體物語

竹裏雙扉時一扣況復主人與我厚三年亭上此
追涼總與荷花相邂逅前年暑雨阻行跡去歲酣

紅照清耐流光鳥過年矢催葵扇蕉衫茲復又小
舟撐出柳隄來短策扶過沙嘴後曲闌三面納花
光一面無花涼樾覆青蘆獵獵界西東白鷺雙雙
飛左右陰晴涼燠屢更番只有此花尚依舊聚合
人生第幾回似我華顛面紋皺波間涼影挾雲移
月底妙香和露透不持寸鐵鬪清機藕孔針鋒怪
詩瘦

題內人銷夏圖

星紈荃葛清無汗弄餌圍棋趁女伴水晶宮殿正
無人搖蕩圓荷紅爛漫芍花荷葉滿方塘不知何

南齋集 卷三
處藏鴛鴦只愁扇上乘繼志女未到秋風怯曉粧

暮雀

喧喧寺門雀日暮識投林托宿卑枝穩依人翠竹
深已棲時復起不定若相尋吾亦慕儔侶翛然碧
岫心

題具公松泉清聽圖

澗水松風世慮忘跣趺宜共玉琴張憑師乞與消
殘暑夢到天台臥石梁

魏東瀾七十

先生風範更超然閱歷承平七十年世有常尊非

爵祿人能老健即神仙杏花門外一林雨芝草山
中五朶煙若訪大茅君隱處積金峯在杖藜前

題趙松雪墨梅

疎花點點墨離離黯淡南枝認北枝不見王孫舊
春色漚波亭上雪晴時

秋日懷感蕙田

數日不相見悵然嗟索居不圖秋草折已是一年
餘檢點緘來字披尋校過書思君惟有夢夢短痛
何如

滑語

脂輪峻走凍石坂
蓴絲嫩足柔荑腕
筍鞋泥行聞竹雞
京江水清稀琉璃

澀語

門樞之壞錫復黏
鐵花繡處加吳鹽
礬頭山前莽榛梗
蟾口寒流咽廢井

酒容

春風着面借杯行
一笑陶然細纈生
藏老難憑通夜力
換朱空有少年情
試看古態熏能出
未覺愁眉掃更輕
待得枕痕和醉減
芙蓉弄色小窗清

題文待詔自寫煮茶圖

玉磬齋中日暮停
雲館裏春閑一舸
水符調得芙蓉湖
上初還

不用石爐砂銚如
聞活火松風安得
筆牀頻過身在圖
中句中

集彈指閣送對琴入都

人物江南秀官資
太學清馬蹄春草
色帆影濁河聲且
緩相思夢能無惜
別情終須膺鸚薦
先欲爲親榮

南齋集卷三終

南齋集卷四

祁門 馬曰璐 佩兮

題趙善長畫楊鐵崖吹笛圖

鐵笛一聲崖石裂
鐵笛道人冠戴鐵
當年誰寫洞庭秋
水底蒼龍叫寒月
小臨海歌聽未終
大雷小雷縹緲中
道人不作水東逝
令人卻憶緱長弓
緱長弓鑄鐵笛空
霜盈襟清淚滴君
不見雲間老客婦
天子不臣諸侯不
友七十二峯屢招
手酌爾圖中一杯
酒

秋雲

冉冉含秋白悠悠共客閒纖微宜照水蕭淡不離
山一片落吟席數年常掩關未知相接處能壓鴈
聲還

九日集平山堂以清氣澄餘滓分韻得滓字
繁英照鬢霜林陰去何駛馬馳車驟閒蕭淡尚如
此雲晴塔影出柳老鴈風起更愛隔江山同赴窗
戶裏流咏碧天高澄懷一無滓何以荅良辰采香
弄秋水

送翁霽堂歸里

先生抱微尚自有古人風積卷暮年惜懷才吾道

窮清言燈影裏握別鴈聲中寒日無潮信雲山有
夢通

題菰江得荔圖

龍牙犀角影離離秀發端如畫省時他日炎天誰
續句露凝重摘待孫枝

初白老人酬方伯公餉署庭荔支有
畫省初凝露之句見炎天冰雪集

問西唐疾

念切平生友敲門問訊頻窗虛通藥氣秋冷怯吟
身以我霜加鬢憐君病損神何時杯酒共把臂復
相親

送家兄懈谷入都

未信別離輕揚鑣入 帝京乍經今遠隔翻念昔
同行謂已巳年爲嶽雪侵華髮河春管去程嘯吟知
不廢終羨鴈南征

同人各賦一物送家兄入都得馬鞭

誰採孤生竹一枝蠟指光爛似琉璃從教疋馬關
河遠未怕長途驅策遲茅店夕陽遙指處凍雲衰
草半籠時不同壺酒聽驪唱祇說難堪贈路岐

送家兄渡河因留滯關口是夜仍泊清江

岸隔黃河落日懸清淮照影各華顛卻因放溜煩
關吏又得篷窗一夜眠

帆脚俄聞報北風征衫料理到裘茸一燈縱喜還
相對離緒紛紜曉馱中

家兄北行未得同渡河竚立南岸久之歸臥
篷窗悵然有作

繁霜曉岸長清話昨宵短未慣經別離握手大河
滿雲鴻南向飛北去適孤館人情怯初程襖被期
共展

襖被亦暫攜莽蒼寧復佳借此一晌共慰此千里
懷如何成獨往悵然始願乖歸吟篷窗詩離思其
能裁

離思在何許掠面寒風發兄弟非少年目斷蕭蕭
髮僮僕日以親行李隔霜雪夢中如識路一水尚
可越

可越不可即所賴良友生謂注跋馬齊魯郊歌馬燕
趙城春風天上來草木咸勾萌惟有向 闕心能
緩思鄉情

送漁川之臨潼

執手忍言別詩愁生去程車煩蒿里曲路盡苦寒
行隴水不可聽秦雲空自橫含辛如有句那似向
時情

辛未仲冬樊榭至自錢湖謝山至自甬上雨
中招集山館有懷家兄懈谷暨于湘北上
一庭寒影暮雲閑時見飛鴻杳靄間詞客喜從江
外至音書猶未汶陽還長途並轡逢朝雨孤館分
燈話故山何事翻教成悵望從來會合感離顏
家兄寄北味并示以詩

宵來有夢憶連牀兼味剛逢遠寄將一幅吟箋如
對面六旬離緒轉縈腸開械盡上聲許兒曹索并有折
簡旋邀酒伴嘗鈴馱勞勞何限意豈須到口始甘
芳

遲樊榭不至

昨日高樓看霽雪今朝朔吹阻吟肩尋思山館虛
欄暮孤鶴巢松相伴眠

懷嘯齋真州江上

雪滿江天獨立時關河冷落動離思
知若箇同攜手能唱屯田柳七詞

嘯齋有懷漁川
秦中長短句

上元前一日集晚清軒時家兄北歸南圻歸

自新安漁川歸自臨潼

交馳南北倦行騰激箭流光硯釋冰行客到家春
正轉故人無恙興重乘分無好句酬佳會各有名

山快獨登試聽劇談忘漏永竹窗添炷夜吟燈

壬申山館上元聯句

山館留賓作上元馬曰東風當戶月當軒張世進光搖積

雪晴逾艷方士影亂華燈夜轉温馬曰到手觥船如下

埭陳章同聲詩句抵吹塤閔流連不怕金吾禁陸鍾輝高

會何妨一笑喧樓

問梅和嘯齋

得君相問訊不覺興飛騰石徑清無着梅花占幾
層雲寒春動未雪老鶴過曾好報山中事閒吟約
定僧

雨宿江口

細雨自空來
點點鳴篷背
一夜流水聲
已飽江湖味

丹陽道中

日暮丹陽路
清波照鬢斑
屢遷惟斷岸
相識有青山
帶雨漁罾濕
耽吟客意閑
春沙迎棹轉
仍復幾灣環

遊慧山三首

秀色晴更幽
未覺巖腹淺
閑房啟松風
石暈記蒼蘚
僧言竹爐好
一物有晦顯
流玩佛香中
落梅心

共遠

何以愜醒趣
憩此山下泉
泠泠一泓玉
照影無春煙
冷翠未殊昔
猶蔭瘦竹娟
飲之得本性
野鳥來客前

清遊已亭午
不暇飯脫粟
石池漾林影
襟袖挹清淑
泉分澗底雲
屋借峯頭綠
名園勝概多
流咏愁未足

虎邱上巳

虎邱山外柳
拂隄虎邱山
中花亂飛
良辰禊飲有
今日僧房猶
及看辛夷
二十年前
曾過此
正是春

風艷桃李重來白髮怕臨流湔裙依舊當時水

晚步劔池

偶坐盤石上契此夜境空鐵花何蒼然照見春星
中棲禽隔樹杪幽夢深幾重

過明瑟園

水木名園好平生夢見之風高存往哲景淡異春
時雙槳破空靄一燈明碧池殷勤主人意延佇訝
來遲

花明照苔綠橋外點沙鷗賦好看雲讀樓高聽雨
留因成三宿戀欲緩五湖遊况是青山暮都將一

榻收

天平山六絕句

水石間

突兀一拳石其色蒼而青此間宜置我流水風冷
泠

白雲泉

寒泉白於乳和雲出巖竇中有堯時天閑房閉青
豆

雲磴

巨斧劈未斷何處着芒屨下有接飲猿上有孤飛

鶴

蓮花洞

雲去無冬春雲來自朝暮萬古青蓮花亦有幽人住

劍削崖

陰崖類削成仄面照山魅誰歟奮一試留得金虎氣

石屋

石屋在山頂蒙龍隔巖綠線路無人爭天風落樵曲

支硎山

清晨坐竹兜心向南峯猛徑改昧支龕山輝隨鶴影莓苔妙莊嚴幽潛發光罔或憩隱士廬或造佛髻頂雪濺雙耳清淙流一筇冷入林雖未深幽境各為領歸途訪遺梅煙昏四山暝

華山

鳥道入深碧磴曲盤松雲山前轉山後酌泉脩竹根傾梯異曩昔可以納趾痕因之凌絕頂崢嶸愁石翻御風念霞舉超心離人羣回視上山路爐煙飄網緼

靈巖山

雲陰隨步起引我入青嶂側聞住山僧建塔卓筆
狀上有圓照塔琴臺昔所登廿載一俯仰繡壤錯林梢巨
浸隱花當茲來勝概增膩水洗塵妄鈴語山古今
曦頽峯背向靈境難久留欲去生悵望歸臥山窗
中晴翠落枕上

鄧尉山

碧瓦隔峯腋遠聞星星鐘一飽興不闌尋誤來花
宮當門蔭清樾經緯皆長松松外已無地渾浸湖
光中古墓訪昔守香雪標前峯惜哉梅花殘清氣

猶霏空虛亭未及上白銀搖冲融

天池

山影淡清暉荒榛隱破扉石梁當路斷龕火入林
微深夜虎疑過多年僧不歸空餘一泓水常是照
雲飛

落木菴

當年結隱有遺踪剩種桃花幾樹紅洗句池頭一
憑弔春風不着着秋風

題晤言圖

風騷流別有鍾譚冷句當於靜裏叅一室晤言相

尚得更留何處染香菴

先生有染香菴稿

往上堯峯及半而返循徑至下堯峯

山銜落日晚霞明萬頃湖波動杳冥茶板蒲團無限思一時分付半峯亭

路返崇岡折幾重林扉遮斷下堯峯不因脩竹留人住那得嘗茶聽暮鐘

過澗上草堂

往哲高風在泠泠澗水清滄桑存畫稿婦孺識先生木主三間屋青山一代名我來春欲暮門外子規聲

韓忠武墓

荒草斜陽動客愁蘄王高冢入耕疇孤忠青史千年在血戰長江萬古流克敵弓亡雲黯黯背嵬軍散鳥啾啾穹碑南望猶多幸三字沉寃卒未休

石壁

嵌空一片別開門湖水時時浸石根二十年中風雨跡重來添得碧苔痕

重過白雲泉

重過曲房暮空山含古春雲生還為客泉靜不嗔人漸覺清陰滿何妨逸興新從誇腰腳健猶一上

嶙峋

食蓴

雉尾絲絲漾碧漪
秋風起後滑流匙
何如湖艇親來往
采及煙莖乍展時
調和頓頓恐傷廉
軟飯香醪筍蕨兼
風味絕清消不得
煙波滿眼下吳鹽

將渡太湖石公山僧來迓

買舟神已王聽語
興彌增雲落一雙屐
詩生七尺藤仙壇
人過少靈洞我探能
好約全湖曲先分石
峽燈

留別明瑟園三首

滿樓山色滿窗雲
最好風光肯見分
不解欲行緣底事
汀花澗草悵離羣
石湖蓴菜家園筍
亭角供吟日有加
第一難忘池上月
照人和影上梨花
靈巖山在有無中
回首名園隔暮鐘
欲把湖波變春酒
可能比得故情濃

雨中聯句

五更風雨聲激潺
陳章勝遊無乃天公慳
閔華隔竹但聞子規鳥
馬曰瑄開窗不見靈巖山
馬曰璐焚香把卷坐亦

得樓逶廊倚閣情何閑陸錫疇老藤作花未爛漫章歸
舟且復停沙灣華

渡太湖聯句

一帆春水五湖天馬曰瑄飛鳥行雲共渺然陸錫疇不信望

中還有地馬曰瑄始知閑外更無仙陳章逃名蝦菜容高

隱閔華寄迹煙波可判年樓錡鐵笛橫吹歌小海曰瑄月

明呼酒石公前錫疇

薄暮登石公山

帆落尋山寺蒼然已日曛紛紛穿石扇往往踏湖
雲崖斷風爲界波吞月不分夜深亭上立招得鶴

爲羣山有風巷
明月坡

白石公山放舟至林屋洞小憩神景宮

天晴霧捲湖無風起隨魚鳥行虛空僧窗幽興落
巖洞清夢早與靈威通沿緣一棹轉山脚朝暎照
耀如仙蓬淡煙淺水花濛濛沙明石淨菖蒲茸捨
舟理策越墟落往往所遇皆春農近看一處蓄靈
異峯頭白石羊羣同左神之天得毋是凡骨到此
幽雲封崢嶸墜石礙置足沮洳積潦愁跼躬未能
金庭入窅窕但聽玉乳鳴丁東綠腸朱髓彼誰子
逡巡日午將何從細搜苔翠辨題字飽餐芝茵休

靈宮洞天不見見福地高松下覆涼陰重歸帆回
望隔微雨再來當復乘清冬

包山寺

嵐翠落衣上山圍殿角涼由來禪窟古不厭石門
荒妙契休松得靈氛過澗長經幢忘歲月閑剔蘚
花蒼

毛公壇

不辨仙壇亂石邊一山還飲鍊丹泉我來筋力差
誇健逢着樵人恐卽仙

石公菴僧樓

天在湖心寫碧水從山外拖藍晴光暮變朝變清
鏡雲涵月涵玉溪生買煙舍鹿門子咏漁菴可許
藤笈載去鷗飛兩兩三三

舟中望縹緲峯

絕巘摩高穹蒼翠望中起日夕落遙陰半浸青蘆
底惆悵蕩扁舟孤心渺煙水

消夏灣送春

飛來白鳥水雲空消夏灣頭柳絮風此地送春兼
弔古縱無雨色亦濛濛

水殿依稀半釣家留連不覺夕陽斜吳王舊事無

南齋集 卷四
人說贏得春愁付落花

洞庭西山有懷同社諸君

攬勝矜深入情移念故人雲澄上古色花亂十洲
春有夢憑風遠無書付鶴頻何當同濯足磐石水
之濱

茶塢雨中招遊石湖

才探縹緲峯頭勝又結楞伽塔頂綠三日水仙分
席後招邀來訊石湖仙
鷺煙鷗雨酒船開不着沾衣半點埃商畧詩情作
幽絕誰人解愛此中來

水窗吹過水雲涼綠筍紅櫻引興長不似江南賀
梅子一川煙草過橫塘

底須明月解留人橋倚行春剩見春被酒歸來掩
窗臥歌雲一縷裊湖濤

送竹町返錢塘

最好鷺峯下聽泉坐竹林因君成獨往令我戀同
岑煙渚分吳榜風燈隔越吟惟將詩一卷慰得暫
離心

吳趨雜詠

淡沲風光淡蕩時清香千古見吟詩宮牆陰合無

人過手採孤花薦左司
 長身仙去對斜暉此日春風載酒稀欲訪棋枰舊
 踪迹亭空兼少鷺絲飛
 幽竹獅林挹勝流飛虹隔斷水悠悠空將北郭詩
 中景攜入雲林畫裏遊
 池荒香草有莓苔剩四嬋娟閣子開文物中吳誰
 繼美我來閑共白雲來

龍井茶銀絲麵送陸南圻

火前紫筍摘陽坡校取蓮心定若何分送故人消
 午睡不妨湯老客來過

不斷千絲與萬絲故鄉風物祇君知如今已近梅
 黃候留待吳均說餅時

過黃梅味更佳南圻云

哭高西唐

忘物兼忘我如君古亦稀忽隨清氣化空見野雲
 飛有句留苔壁無人叩竹扉平生知己淚一想一
 沾衣

狷潔不可挽高風人共尊煙雲托性命枯菀付乾
 坤以我平生久重君交誼存深情難盡述痛哭返
 柴門

又廿四韻

君生自在天

西唐有自在天小照

胸次化畦畛膠膠擾擾中未

礙尺幅窘潔性水澄泓高懷山嶷嶙已絕時所趨
終信貧可忍蕭散鶴出羣俊逸驥脫鞵四海數勝
流平生此標準可憐伯牛灾罔逢扁鵲診妻子一
煩寬交遊共幽憤而況遲鈍姿文事賴子引憶昔
始訂交相顧各元鬢清機出天骨不獨擅丹粉六
法辨豪芒二篆鏤駮躡房吟露蟬壞壁掃春蚓
杯空雲峯遙燈炮寒飈緊晦明風雨交古調曾未
泯劉華而崇實遑恤旁觀哂見君常緼袍歎君只
茗筍俯仰君無慚逡巡我不敏迄今五十年渾如

一日近方謂蒲柳衰望秋輒先隕如何煙霞質一
朝隨化盡松死竹失陰弦絕琴摧軫腹痛深巷苔
涕雪荒庭槿百感從中來斜陽半林隱

環溪新池分得瑟字

環溪新鑿池對此眼塵失空光鏡面涵人影波心
出誰開魚鳥天別具煙雲筆中可泛清琴風來秋
瑟瑟

日出入沈歸愚先生同作

白日杲杲升扶桑循環無端虞淵藏彌綸天地周
八方六螭不息四運忙黃氣赤暈五色光倒景迴

車非魯陽羲和安行壽而康嘉祥屢臻化國長萬
億斯年未渠央

擬陶淵明飲酒歸愚先生同作

大道本無我萬化同一初達人貴埋照渾樸接黃
虞胡爲是與非乃用分區區時運有期會酒中無
榮枯當前不爲樂坐失良可吁敬頌德與功豈不
在提壺

壺觴有何好中有萬古醇詩書成聚訟塵事徒紛
紜偃臥北窗下陶然養吾真藹藹林木秀欣欣雞
犬繁冲懷集虛曠意愜道斯存毀譽付醒者儻來

誰能論

賦得殘月如新月

纖纖缺月淡光籠還似初生莫莢中一樣向人弓
勢曲兩回含影桂華空成虧相代吟方覺榮落雖
殊看卻同斜挂玉鉤開鏡曉也應誤拜出簾櫳

送風沂給諫還朝

萊衣未許戀南陔卻被甘泉玉漏催岱嶽雲生迎
騎去掖垣花暮寄書來聊憑細雨遮行色還共春
風泛酒杯他日相思定何許綠蕉脩竹鴈飛回

咏蕉竹
諸作

同曾

時雨得十字

朝見濃雲布郊野暮聽長雷周國邑一陰交後正
三時喜有膏霖灑靈霄插禾處處鳥聲歡逐婦聲
聲鳩語急雖然甘澤未成謠免插楊枝煩井汲去
年鄰境偶無收目蒿流亡沿路泣今春宿麥秀兩
岐更荷天庾減租入天心仁愛有轉旋可望肥磽
一霑濕三農和氣在東菑五月青秧低弱笠冬困
預卜倉盈千何止家家餅坼十

哭外舅外母

半生展敬過庭闈仰範瞻慈每不違花藥開時先

命賞杯盤空後尚無歸幾回夜月承清訓猶憶春
風逐綵衣鳩杖兩條閑倚壁傷心惟見白雲飛
自是高門多玉樹匪材依倚愧蒹葭恩深半子同
才子居近兩家如一家謝女香埋情倍篤枚孫年
小惠頻加如何奪我雙頭白淚盡啼烏到日斜

荷亭和補齋先生

荷繞小亭虛花疎出葉餘水風放艇後涼意過橋
初林密深含雨波清淺露魚不知射湖上較此定
何如

送洪曲谿吳越之遊

離思先懸滿帆風看君華髮欲成翁半生藥債兼
詩債一舸吳中更越中瘦骨定逢秋氣健好山能
使夙愁空也知徧倚江南樹野水閒鷗有夢通

題仇十洲畫冊得秋蟲圖

蕉陰覆砌雲根瘦玉簟初涼正閒晝誰家雪色最
柔肌解弄王孫恣朋鬪提攜似是小金籠由來重
事歸兒童偃旗臥鼓有勝負穰苴兵法存其中
驕兒詩穰苴兵法躡足呼燈曾灌穴不識人間有騷屑即今
看畫憶兒時寒風一陣飄華髮

哭樊榭

大雅今誰續哀鴻亦叫羣情深攜庾信義重哭劉
蕢望遠無來轍呼天有斷雲那堪聞笛後又作死
生分

社友凋喪及樊榭而五

冷泉流不盡游跡憶前經一舸載春雨卅年成聚
萍史收遼散佚詩紀宋英靈
樊榭有所輯遼史補遺及宋詩紀事寂寞叢
書畔高樓剩墜螢

握手看徂謝詞場失總持秋燈弔影瘦明月照情
癡
樊榭惆悵詩有秋衾空抱月明歸之句遂成絕筆秋燈詞別時同作集在無兒守魂歸戀母

慈絕弦予白首仍是歲寒期

骨相由來異科名不救貧授書寧負笈化鶴定朝

直聞其墮地時卽有異未就外傳已能屬文似此堪千古如君復幾人重爲
吾道惜四海一沾巾

同人復爲位哭於行菴

故人隨逝水灑淚駐行雲只此平生意寒花如見
君香清緣竹盡葉響帶鐘聞不道行吟地傷心日
易曛

春日獨過南莊

蒲帆十幅卸孤村斷浦潮回岸減痕我自不來風
物換荒寒一段在籬門
疎梅無復照深杯竹翠籠香散碧苔冷臥虛窗閒

有思昔時明月夢中來

喜方息翁至自桐城

此生何分得周旋白髮飄蕭號列仙良玉久經三
日火清詞橫瀉百重泉名城拔幟知無敵大馬捶
鈎信有傳謂竹垞翁今日相逢秋色裏一尊如對閬風巔
爲息翁題曝書亭留客圖

學有淵源緒有因萬書堆裏住經旬卽今讀畫生
遙集何況當年北面人

手握靈蛇六義宣風騷流別盛龍眠翦燈夜話無
窮意猶在蕭蕭水竹邊

聽息翁談春及堂集中往事

三朝風範逐流波蓋代文章付刹那頭白詞人揮
塵處八哀併作一聲歌

松窗添對一燈青話到蒼涼衆葉零賴是予生未
相識不然爭耐夜深聽

蕩子有賢婦行

峩峩山上石泱泱溝中水山石久逾堅溝水流不
已嗟哉良人勤結束自此明燈照空局成行七十
二鴛鴦只有孤鸞偏獨宿音塵決絕年復年此生
已分隔黃泉寫就零丁帖一紙清淚惟對孤兒懸

孤兒孤兒走萬里意外相逢廣陵市阿父久已不
識兒那識居然兒抱子男兒愛後妻欲歸仍留連
故鄉有廬復有田睢陽破鏡期重圓君不見季隗
二十五年不來則就木又不見張介尋爺走巴蜀
刺血寫經古已難織錦回文世所獨何如村野中
大義明中天兒克盡孝由婦賢敦行厚俗此有焉
誰爲書之青史傳

賦得以詩爲佛事

禪事通吟事吟朋卽道朋探驪頓悟入挂角冥搜
能句好非無法心傳亦有燈妙香分一瓣微諦合

南齋集 卷四
三乘逸響魚山梵清機鴈塞僧投名白蓮社陶謝
至今稱

同人作消寒詩會息翁畏寒不赴以詩招之
卽用其辭會原韻

白社今年吟興劇重疊詩篇在箋尺文場遠闢雄
萬夫儒服竒溫勝羣腋季冬淮海有斯辰杖履春
隨五舒客浩歌袖出皖公山魯酒傾同廣陵陌弘
獎由來畧歲年披豁真能露肝鬲曹鄴欣逢大國
楚氣竭惟憑丹度厄畏寒俄聞折柬辭餘暖旋令
失孔席采葑詎是遺邶風發蒙尚望占姬易先生

和氣排冬嚴定自掀髯笑啞啞急須畫壁約龍標
莫漫還山咏高適車斜繼和更而今會合聯吟期
在昔何況東風拂面來梅見天心望友益只愁脉
望化無緣字食神仙遭斥謫蟬書樓下覆吳圖枯
棋可許拈三百

和息翁扇頭韻

寒廳開到欸冬花詩老吟情詎有涯直待圍爐過
九九一江春水送還家

喜茶塢至自吳門同人集行菴共談春日遊
洞庭之勝

寺門逢握手回憶洞庭過靈境三秋隔煙波兩鬢
皤劇談疑夢寐重到恐蹉跎未卜明年健梅開與
若何

行菴冬菊

秋霜凋不得把蕊覺寒增已少穿籬蝶惟依罷講
僧香清華髮短色淡遠山澄一種江梅畔蕭然風
雪勝

清冬

古寺愜冬趣林空鴈影沉白雲晴少態黃葉下無
心以此邀疏酌因之拂素琴遙情生夕照巖壑更

誰尋

歲暮雪中同竹町玉井家兄嶰谷登彈指閣
侵曉風折綿入寺雪平屋登玩佛閣佳畫此一片
玉凍雀僵于人踏枝抱寒木老樹如弓彈半作困
蠢縮杈枒入肺肝禁瘁生體粟本非真實相卻眩
人天目何況聞妙香松風茶鼎熟尋聲杳不見聲
在隔墻竹

人日集山心室問訊篠園梅花用東坡和秦
太虛韻

詩翁筆端如振槁擺落寒氛成絕倒春回物象困

雕鐫先有梅花被詩惱一枝未報水邊斜萬竹行
 探籬外早雪殘想見入南枝縱是開遲看亦好江
 山夢醒人未覺弦管聲喧跡尚掃况當人日約吾
 儕勝裏金花耐身老盤蔬尊酒兆初正游事今年
 非草草關心更此早訊公莫待花繁方向昊

癸酉上元聯句

頻年詩句酬佳節馬曰又設壺觴聚故人張世進風景不
 殊明月夜方士處山齋依舊早梅春馬曰鄰家歌管燈前
 沸閔我輩談諧醉後真陸鍾輝如此元宵堪記取張四科白
 頭相見鎮常新樓

晚清軒嘗橘酒聯句

洞庭春色釀初成程夢星裂鼻香濃滿甕清馬曰三百顆
 從霜後摘張世進十分杯向掌中傾方士處逡巡遠過松花
 味馬曰記注休誇竹葉名陳章不用雙柑學仲若陸鍾輝也
 堪攜聽早鶯聲閔

新蝶

生長在花房翩翩傳粉香夢猶迷楚客畫已學滕
 王幾日春如海一雙飛過墻南園芳草綠初試舞
 衣裳

社雨

踏青沙未沾寒食火待潑霏微三數點已覺春態
活換水語近諧社公名不拔大抵膏農田白氣橫
野闊微晴燕子飛帶煙杏花發我亦老稱翁露潤
到硯渴

春江漁父詞

如鏡晴江理釣綸綸竿占卻一江春桃花紅處臥
吹笛時有白鷗飛近人聞聲不見有船至此是春
江最深處醉醒蓑笠總隨身任我夷猶自來去况
當雲碧更山青日暮鳴榔入杳冥不信夜來風雨
過一江煙浪夢中聽

擬曹唐大遊仙得裴航搗藥

信是良緣夙世成雲翹遇後遇雲英未從瓊液通
靈籍已向瑤篇識小名玉杵挈將仙有約元霜搗
盡月無聲劉綱夫婦丹臺畔眷屬由來總上清

含雨亭補種桃花時吳興沈勉之太史適至

短墻廢院春風出依舊桃花開往日鶯邊佛火解
氛氲竹外僧樓破蕭瑟一亭草草花當中菜花缺
處香茅重尚嫌客至色閑淡清晨旋買南家紅買
來補種空林下密密疎疎低復亞已兼蛺蝶到階
前不放斜陽入簾罅萬事無過酒滿巡薰面何如

下若春更添八韻東陽句便是仙源嬾問津

懷竹町對鷗

日日長相見猶然役夢思
可堪風雪過更復歲華
移竹屋燈前酒梅花湖外詩
幾時話離緒驗取鬢
間絲

南齋集卷四終

